



Fakkeenyummaa Aadde Guyyeefi Obbo Ganamoo

Leveled



Kitaabni deggarsaa kun gargaarsa maallaqaa 'USAID' irraa argameen Dhabbata 'Save the Children' fi Biiroo Barnoota Oromiyaa Wajjin qophaa'ee kan maxxanfamedha.

Bara 2009/2016




The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>



Fakkeenyummaa Aadde Guyyeefi Obbo Ganamoo

Kutaa 4





Boqonnaa 1: Aadde Guyyeefi Obbo Ganamoo

Aadde Guyyeefi Obbo Ganamoon haadha warraafi abbaa warraati. Namoonni kun Aanaa Kofalee Ganda Saa'immanna keessa jiraatu. Jireenyi isaaniis kan hundaa'e qonnarratti.

Qonnaan bultoonni kun ijoollee lama qabu. Ijoolleen isaaniis Turaafi Bulee jedhamu. Turaan angafa yoo ta'u, Buleen ammoo quxisuudha. Turaafi Buleen barattoota.

Aadde Guyyeefi Obbo Ganamoon yeruma hunda namoota ollaa isaanii dura ganamaan hirribarraa ka'u. Akkuma hirribarraa ka'aniinis walgargaaranii buna danfisu. Ollaa isaanii waamanii bunichas waliin dhugu.

Ollaan Aadde Guyyeefi Obbo Ganamoo jara ajaa'ibsiifachaa buna dhugu. Namoonni tokko tokko osoo akka isaanii taanee jechuun hawwii isaanii ibsatu. Kaanis afaanii hinbaafatin malee, garaa isaaniitti Aadde Guyyeefi Obbo Ganamoo dinqisiifachuu hinhafne.

Dinqisiifannaan isaanii kanas baasanii Aadde Guyyeefi Obbo Ganamootti dubbachuu hindandeenye. Garuu karaa adda addaa ibsuufi eegalan. Kana keessaa inni tokko nyaata affeeranii waamuudha. Inni biraan ammoo ijoollee isaaniitii meeshaa taphaa bituudha. gariin ammoo akka isaan ciccimoo ta'a baaseetuma itti hima ture.

Erga ollaa isaanii waliin buna dhuganii booda, nyaataafi dhugatii ijoolleen isaanii fudhatanii mana barumsaa dhaqan qopheessu. Kana malees, ijoollee isaaniitti uffata mana barsumaa uffisu. Kanas yeroo muraasa keessatti raawwatu.

Sana booda, Aadde Guyyeefi Obbo Ganamoon hojii qooddatu. Aadde Guyyeen ijoollee mana barnootaatti geessiti. Obbo Ganamoon ammoo ameessa moonaadhaa baasuun elma. Sana booda, loon moonaa keessaa yaasuun margatti bobbaasa.

Loowwan isaanii hedduu waan ta'aniif kara karaa deemanii dheeduu eegalan. Akka loowwan quufaniifis gara marga lalisaatti geessa. Bakka loon itti bobbaasee ammoo jirma abiddaaf ta'u muratee gala.



Boqonnaa 2: Hojii Mana Keessaa Walgargaaruu

Aadde Guyyeen ijoollummaa ishiitti mukni iirratti jigee miilli ishii tokko laamsha'e. Kanaraan kan ka'e, dhaabata qabattee deemti. Haata'u malee, waan namoonni miidhama qaamaa hinqabne hojjetan hunda hojjetti.

Aadde Guyyefi Obbo Ganamoon dabareen ijoollee isaanii mana barnootaa geessu. Osoo isaan manaa hinbahin garuu walgargaaranii waan isaan barbaadan hojjetuuf.



Kunis nyaata isaan fudhatanii deeman qopheessuu,
huccuu itti uffisuufi barruu isaanii qopheessuufidha.

Manni barnootaa ijoolleen Aadde Guyyeefi Obbo
Ganamoo itti baratan mana isaaniitti dhiyoodha.

Kanaafuu, yeroo gabaabduu keessatti ijoollee isaanii
achiin gahanii deebi'u. Yeroo ijoolleen isaanii mana
barnootaatii bahanis battalaan dhaqanii fudhatu.

Aadde Guyeenis guyyaa dabaree ishii ijoollee ishii
meeshaa isaanii baachiftee mana barnootaa geessiti.
Ijoolleen ishiis yeroo mana barnootaa gahan haadha
isaaniitti nagaa dhaamanii mooraa seenu. Aadde
Guyeenis gara manaatti deebiti.



Gaaf tokko Aadde Guyyeen ijoollee mana barnootaa geessitee gara manaatti deebite. Yeroo ishiin mana geessu, Obbo Ganamoon ameessa elmee jira. Ishiinis aannan inni elme harkaa fuutee ol keesse.

Aadde Guyyefi Obbo Ganamoon walgargaaranii hojii mana keessaa xumuran. Nyaata ijolleen isaanii galanii nyaatanis qopheessu. Bunas tumanii lafa keewwatan.

Bunni isaan tumanii keewwatan akka afuura bahee mi'aawuu hindinnetti qodaa bunaa qadaaddatan. Ittaansuun, qodaa mana keessaa kan itti nyaatan karaarraa kakaasan. Kanas kan raawwataniif akka yeroo gara manaatti deebi'an isaan hinrakkifneefi.



Boqonnaa 3: Hojii Qonnaa Waliin Hojjechuu

Aadde Guyyeefi Obbo Ganamoon boqqolloo aramuutti bahan. Yeroo kanas waa'ee jirenya isaanii buusanii baasanii mariyachaa hojjetu turan. Kanaafis osoo dadhabbiin itti hindhagahamin hanga garaa isaanii aramatu.

Hojicha keessas hanga waaree boodaatti turan.

Aadde Guyyeefi Obbo Ganamoon ijoollee isaanii mana barnootaatii fiduuf hojicha keessaa manatti galan. Mana gahaniis harka isaanii saamunaan dhiqatan.

Aadde Guyyeen abidda qabsiifachuu eegalte. Sana boodas, buna ganama tumanii keewwatan danfisuu jalqabde. Nyaatas kan duraan hojjetatan ho'isuu itti fufte.

Hanga Obbo Ganamoon ijoollee mana barnootaatii fidee dhufuttis Aadde Guyyeen mana ishii harattee qulqulleeffatte. Bakka tataa'anii buna dhugan tottolfatte. Qodaa itti nyaataniifi shinii buna itti dhuganis dhiqxee qopheeffatte.

Obbo Ganamoon ammoo akkuma harka isaa dhiqateen huccuu hojji jijiirrate. Battaluma sanattis gara mana barumsaatti qajeele. Akkuma achi gaheen ijoolleen isaa mana barumsaatii gad itti bahan.

Obbo Ganamoon ijoollee isaa fudhatee gara manaatti qajeele. Ijooleen isaas meeshaalee nyaataafi barruulee isaanii dugdatti baadhatanii waliin deemuu itti fufan. Karaarrattis waan guyyaa sana baratan ijoollee isaa gaafachaa, ijolleen isaas deebisaafi mana gahan.

Obbo Ganamoon balbal dura gahee quqqufa'e. Kana ammoo durumayyuu osoo mana hinseenin niraawwata
ture. iIjoolleenis isuma waliin quqqufa'an. Haadha
isaaniitiin dhufnee jirra jechuuniidha. Aadde
Guyyeenis mana keessaa quqqufaate. Baga nagaan
galtan jechuunii isheeti.



Boqonnaa 4: Dhukkubsataa Ollaa Gaafachuu

Akkuma ijoolleen ishii mana gahaniin karaatti simatte Aadde Guyyeen. Sana booda, waliin laaqana nyaatan. Laaqana boodas, buna dhugan.

Obbo Ganamoon akka ijoolleen isaanii yeroo gabaabduuf boqotan taasise. Sanaafis dirree mana isaanii boroo jirurra akka taphatan hayyameef. Isaanis kubbaa miillaa moofaaraa tolfameen ijoollee ollaa waliin taphatan.



Aadde Guyyeefi Obbo Ganamoon nama ollaa isaaniitii dhukkubsatu gaafachuuf murteessan. Haaluma kanaan osoo loon galchuun hinga'in buna isaanii danfifatanii gara mana namichaa deeman. Manni namichaas mana isaaniitti dhiyoo waan ta'eef, dafanii achi gahan.

Yeroo isaan nagaa gaafatnii ol seenan, namoonni mana guutanii jiru. Aadde Guyyeen buna fuudhattee daqxe sana buusuun namoota achi jiranis ta'e warra manichaa obaaste. Namoota waliinis bunicharratti waa'ee dhukkuba namichaas ta'e waa'ee naannoo isaanii buusanii baasanii haasa'aa turan.

Namichi dhukkubsatus waan fooyya'eef, namoonni isa gaafachuu dhaqan hunduu gammachuudhaan haasa'u. Aadde Guyyees ta'e Obbo Ganamoon gammachuu namichi fooyya'ee osoo namoota waliin hirmaatanii loon galchaan gahe. Nagaas itti dhaamanii loon galshachuuf gara mana isaaniitti qajeelan.

Akkuma isaan manaa bahaniin namoonni namicha biratti hafan waa'ee isaanii haasa'uu eegalan. Akka isaan fakkeenya namoota naannoo sanaa ta'anis kaasaniis dubbatan. Kunis guyyaa rakkotti akka dafanii nama qaqqaban, ijoolee isaaniis seeraan guddifachaa akka jiran dubbatan.



Boqonnaa 5: Fakkeenyaa Gaarii Ta'uu

Itti dabalees, dubbataniis hojjetaniis akka nama
hinmadeessine dhugaa bahaniif. Aadde Guyyeefi Obbo
Ganamoon rakkataadhaaf midhaan gombisaadhaa
hammaaranii kenuuf. Kaaniif ammoo areera buusu.

Namoonni ollaa Aadde Guyyeefi Obbo Ganamoo
sangoota hedduu qabu. Kaaniin ofii qotataa kaaniin
ammoo qochisiifatu. Oyiruun isaaniis bal'aadha.

Bal'ina oyiruu isaaniirraan kan ka'e kan qotanii kan dhiisaan hinbeekan. Midhaan qotanis namoota ollaa isaaniitu itti yaa'ee haramaaf. Ollaan isaanii daraan waan isaan jaallatuuf ofumaan itti bahee hojjetaaf.

Oomishni Aadde Guyyeefi Obbo Ganamoo daran dabala deeme. Haaluma kanaan hojjettoota hedduu isaan barbaachisaa deeme. Maatiin duraan ofii hojjechaa turan, amma hojjettoota hedduu miindessuun hojjechiisuu eegalan.

Namoota kaan ammoo loon egsisuuf miindessan. Gariinis moonaa loonii jijiiruuf miindeffaman. Hundinuu hojuma itti miindeffame waan hojjetuuf, waan adda addaatti cece'anii xiyyeeffannoo dhabuun hinjiraatu.

kana jechuun si'uma tokko fuuleffatanii hojii isaaniitti baanaan sanuma jabeessu. Hojii manaas ta'ee kan manaan alaa sagantaadhaan raawwatu. Waan sagantaa hinqabnes hinhojjetan.

Hojiin mana keessaas akkuma hojii alaa hojjettoota barbaade. Kanarraan kan ka'e, Aadde Guyyeefi Obbo Ganamoon namoota sa'a elman qofaatti miindessan. Kana malees, namoota hojjettootaaf nyaata qopheessan miindessuun dirqama isaanii ta'e.

Aadde Guyyeefi Obbo Ganamoon hojiin isaanii inni guddaan bakka hojii qoqqooddatan irraa deemanii to'achuu ta'e. Rakkoo isaaniirrattis waan hirmaataniif, hojjettootni isaanii daraan isaan jaallatu.



Qabanni isaas, Adde Guyyeefi Obbo Ganamoon fedhii mataa isaaniirra kan namootaa dursu. Yoo nama gammachiisan malee akka hingammanne beeku. Kana ammoo hijii isaaniitiin mul'isu.

Galiin Aadde Guyyeefi Obbo Ganamoon waggaatti argatan haalaan dabale. Kun ammoo gurra namoota aanaa sana bulchanii gahe. Kanaanis aanaa isaanii keessatti qonnaan bultoota cimaa jedhamanii galmaa'an.

Obbo Ganamoofi Aadde Guyyeen badhaasa sadarkaa aanaatti kennamuuf kaadhimaman. Guyyaa badhaasa sanaas Aadde Guyyeen akka fuutuuf taasifame. Namoonni Ollaa isaaniis, “Osoo akka isaanii taanee maal qabaa,” jechuun Aadde Guyyeefi Obbo Ganamoon fakkeenyga gaarii ta’uusaanii hubatan.

